

Evening Dogri (NSD) Bulletin 26-10-2024

आकाशवाणी

खास खास खबरां ...

- 1 प्रधानमंत्री नरेन्द्र मोदी होर आकाशवाणी दे मन की बात कार्यक्रम च लोकें कन्नै कल अपने बचार सांझे करगंन।
- 2 प्रधानमंत्री मोदी 28 अक्तूबर गी गुजरात च तकरीबन 49 सौ करोड़ रुपें दी लागत दे प्रोजेक्टें दा उद्घाटन करगंन।
- 3 कर्मचारिणं दे राज्य बीमा योजना तैहत अगस्त महीने च 20 लख 74 जहार नमें वर्करें गी शामिल कीता गेआ।
- 4 भारती मोसम विभाग नै ओडिशा दे चक्रवात प्रभावत इलाकें च होए दे बरखा बरने दी भविष्यवाणी कीती। राहत ते बचाह अभियान जोरें—शोरें जारी न।
- 5 पुणे टैस्ट मैच न्यूजीलैंड नै भारत गी 113 रंजें कन्नै हराई दित्ता।

<><><><><><>

Man Ki Baat

प्रधानमंत्री नरेन्द्र मोदी होर कल आकाशवाणी दे मन की बात प्रोग्राम च देश प्रदेश च रवा'रदे लोकें कन्नै अपने बचार सांझे करगंन। एह इस रेडियो प्रोग्राम दी 115मीं कड़ी होग। प्रोग्राम दा प्रसारण आकाशवाणी ते दूरदर्शन दे पूरे नेटवर्क एयर न्यूज़ वेबसाइट ते न्यूज़ ऑन एयर मोआइल ऐप उपपर होग। एहदे इलावा आकाशवाणी ते डीडी न्यूज़ दे यूट्यूब चैनलें उपपर एहदा सिद्धा प्रसारण कीता जाग। आकाशवाणी प्रोग्राम दा क्षेत्रीय भाषा च अनुवाद हिंदी प्रसारण दे तुरत परैत करी देग।

<><><><><><>

PM Gujrat

प्रधानमंत्री नरेन्द्र मोदी 28 अक्टूबर गी गुजरात दा दौरा करगंन ते केई प्रोजेक्टें दा उद्घाटन करगंन ते केइएँ दा नीह पत्थर रखगंन। दौरे दरान श्री मोदी स्पेन दे प्रधानमंत्री हुंदे नै सी-295 विमान दे निर्माण लेई टाटा विमान परिसर दा उद्घाटन करगंन। प्रधानमंत्री मोदी इमरेली च भारत माता सरोबर दा उद्घाटन ते तकरीबन 4 जहार 9 सौ करोड़ रपे दे प्रोजेक्टें दा नीह पत्थर बी रखगंन। उनें प्रोजेक्टें कन्नै राज्य च अमरेली, जामनगर, मोरबी, देवभूमि द्वारका, पोरबंदी, कच्छ ते बोटाद जिले गी फायदा होग। संपर्क च सुधार लेई प्रधानमंत्री 21 जहार 800 करोड़ रपे थमां मती दी केई शिड़क परियोजनाएं दा उद्घाटन करगंन ते केइएँ दी बुनियाद रखगंन। ओह तकरीबन इक जहार 1 सौ करोड़ रपे दी लागत कन्नै पूरी होई भुज-नालियां रेल गेज रूपांतर गी संमर्पित करगंन। श्री मोदी अमरेली जिले 41मीं आपूर्ति विभाग दी 7 सौ करोड़ रपे थमां मते दी बक्ख-बक्ख विकास प्रोजेक्टें दा बी उद्घाटन करगंन। प्रधानमंत्री पर्यटन कन्नै सरबंधत विकास पैहलुएं दी बुनियाद बी रखगंन, जेह्दे च पोरबंदर जिले दे मoker सागर च कारली रिचार्ज इको पर्यटन स्थल च बदलना शामिल ऐ।

<><><><><><>

Maharashtra Election

कांग्रेस नै 23 ते शिवसेना दद्धव बाला साहेब ठाकरे नै 15 मेदवारें दी अपनी दूई सूचि जारी करी दित्ती ऐ। कांग्रेस नै महाराष्ट्र दे साबका मंत्री वसंत पुरके होरें गी सलेगांव, अनुजा कोवर होरें गी सावनेट दिलीप बसोड़ होरें गी अर्जनी मारेगांव कैलास गौरटयाल होरें गी सायन कोलीवाड़ा थमां मैदान च तोआरेआ ऐ। शिवसेना नै धुले थमां अनिल होरें हिमोली थमां रूपाली पाटिल, शिवड़ी अजय वौधरी ते बाइकुली थमां मनोज जमसुतकर होरें गी मेदवार बनाया ऐ। महाराष्ट्र विधानसभा चुनां लेई 29 अक्टूबर तगर नामांकन दाखल कीते जाई सकदे न। मतदान 20 नवम्बर गी होग ते वोटें दी गिनतरी 23 नवम्बर गी होग।

<><><><><><>श

ESI Scheme

कर्मचारिणं दी राज्य बीमा योजना तैहत् इस ब'रे अगस्त म्हीने 20 लक्ख 74 ज्हार नमें वकर्रे गी दर्ज कीता गोआ ते श्रम ते रोजगार मंत्रालय नै आखेआ ऐ जे अगस्त म्हीने च 28 ज्हार 9 सौ नमें इदारे गी ईएसआई योजना दे समाजी सुरक्षा दायरे च आंदा गोआ ऐ ।साल दर साल दे विश्लेषण च पिछले ब'रे अगस्त दे मकाबले शुद्ध पंजीकरण च 6.8 –0 दी बढ़ोतरी दिक्खी गई ऐ ।

<><><><><><>

Bhopal

सूचना ते प्रसारण मंत्री ते संसदीय कार्य मंत्री डॉ. एल.मुरुगन होरें आखेआ ऐ जे प्रधानमंत्री नरेन्द्र मोदी होरें स्वच्छता अभियान गी घर–घर पजाया ऐ । डॉ. मुरुगन होरें अज्ज भोपाल च नगर निगम दे सैहयोग कन्नै पत्र सूचना कार्यालय आस्सेआ आयोजित कार्यक्रम वार्तालाप स्वच्छता दा इक दाहका स्वच्छ भोपाल लेई विशेष पैहले गी संबोधत कीता । कार्यक्रम च भोपाल सांसद आलोक शर्मा, मेयर मालती राय, नगर निगम कमीशनर हरेन्द्र नारायण ते प्रसे सूचना ब्यूरो दे अतिरिक्त महानिदेशक प्रशांत पाठराने बी शामिल हे ।

<><><><><><>

Delhi Pollution

दिल्ली च ब्हाऊ दी गुणवत्ता स्तर गी केन्द्रीय प्रदूषण नियंत्रण बोर्ड आस्सेआ “खराब” श्रेण च रखेआ गोआ ऐ । बोर्ड नै दपैहरी इक बजे राष्ट्रीय राजधानी च ब्हाऊ दी गुणवत्ता सूचकांक 235 दर्ज कीता ऐ । सिफर थमां 50 बश्कार एक्क्यूआई खरा मन्नेआ जंदा ऐ । 101 थमां 200 गी दरम्याना, 201 थमां 3 सौ गी खराब,

301 थमां 4 सौ गी मता खराब मन्नेआ जंदा ऐ। इस्सै चाल्ली 401 थमां साढ़े 4 सौ दे बश्कार दा एक्यूआई गी गंभीर मन्नेआ जंदा ऐ।

<><><><><><>

Data Extended

परतक्ख कर यानि डरैक्ट टैक्स सरबंधी बोर्ड सीबीडीटी नै कारोबारी करदाताएं लेई 2024–25 आले आंकलन ब'रे लेई इंकम टैक्स रिटर्न भरने दी खीरी तरीक अगड़े बधाई दित्ती ऐ। खीरी तरीक जेहड़ी पैहले 31 अक्टूबर रखी गेदी ही, उसी हुन 15 दिन होर बधाइयै 15 नवम्बर करी दित्ता गेआ ऐ।

<><><><><><>

Martyrs Day

महावीर चक्र कन्नै सम्मानित शहीद ब्रिगेडियर राजिन्द्र सिंह हुंदे शहीदी दिवस दे मौके पर अज्ज केई कार्यक्रमें दा सरिस्ता कीता गेआ। कश्मीर दे रक्षक खेआने आले ब्रिगेडियर राजिन्द्र सिंह 1947 च 21 अक्टूबर कोला लेइयै 26 अक्टूबर जोड़ी बक्ख–बक्ख मोर्चे पर पाकिस्तान फौज दे कबाइली हमले दी शकली च कीते गेदे हमलें गी नाकाम कीता। पाकिस्तान दी तरफा चानचक्क कीते गेदे हमले दे दरान महाराजा हरि सिंह हुंदे निर्देश परबड़े घट्ट सैनिकें कन्नै ज्हारा बद्धे पाकिस्तानी हमलावरें गी रोकेआ ते इक दे बाद इक उंदे केई हमलें गी नकाम कीता ते जम्मू कश्मीर दी रक्षा कीती। 26 अक्टूबर दी रात वीरगति गी प्राप्त होए ते 27 अक्टूबर गी भारतीय फौजां हीरानगर च उतरियां ते पाकिस्तानी हमलावरें गी पिच्छे धक्कदे होई वापस नस्सने पर मजबूर करी दित्ता।

<><><><><><>

India-Pakistan-UN

भारत नै संयुक्त राष्ट्र सुरक्षा परिषद च पाकिस्तान दी निंदेया कीती ऐ ते कश्मीर दा पुट्टने गी दुश्प्रचार फैलाने दा ओहदा पुराना उसकाने आला तरीका दस्सेआ ऐ। संयुक्त राष्ट्र सुरक्षा परिषद च बदलदे परिवेश च शांति कायम करने च महिलाएं दी भूमका बारे इक चर्चा च भारत नै परता देने दे अपने अधिकार गी बरतदे होई पाकिस्तान च अल्फसंख्यक समुदाय दी महिलाएं दी दयनीय हालत लेई इस्लामाबाद दी निंदेया कीती। न्यूयार्क च संयुक्त राष्ट्र च भारत दे स्मार्ट नुमायंदे परवथानेमी हरिश होरें आखेआ जे पाकिस्तान च महिलाएं दी माड़ी हालत पर बोलने दी थाहर ओहदा प्रतिनिधिमंडल झूठा प्रचार करने दे पराने रवैये पर कायम ऐ। हरीश होरें शांति मिशनं च भारत आस्सेआ महिलाएं दी नुमायंदगी बधाने ते महिला शांतिकर्मिं दी समर्थ बधाने दे जतनें दी जानकारी दिक्ती।

<><><><><><>

Odisha

ओडिशा दे समुंद्री तटें आले जिले च भारी चक्रवात कन्नै प्रभावत इलाके च बाआबसदकारी ते सेवाएं गी ब्हाल करने दा कम्म जोरें—शोरें कन्नै चला'रदा ऐ ते इस तूफान करी केई इलाकें च बिजली दी लाइनां त्रुट्टी गेइयां हियां। मती गिनतरी च रूकख बूहटे ते बिजली दे खम्बे ढेई गेदे ते धान दे खेत्तरें गी नुक्सान नुज्जा हा। भयंकर चक्रवात दाना नै पिछले वीरवारें ते शुक्रवारें ओडिशा तट दे भितर कनिका नैशनल पार्क ते धर्म दे बश्कार मझैटली रातीं जमीनें पर उत्तरी गेआ हा। ताजा बुलेटन च भारतीय मौसम विभाग नै आखेआ ऐ जे चक्रवात तूफान हुन कमजोर होइयै ओडिशा दे उत्तरी हिस्से च घट्ट दबाह् आले क्षेत्र दे रूपै च तब्दील होई गेआ ऐ। एह्दे होर कमजोर होने ते अगले 24 घेंटे दे अंदर पूरी चाल्ली शांत होई जाने दी संभावना ऐ। तूफान करी ओडिशा दे भद्रक, केन्द्रपाडा, बालेश्वर, जाजपुर ते मयूरभंज जिलें च मती तेज बरखा होइ ही। राज्य दे केई हिस्सें च बरखा अजें जारी रौहने दी संभावना ऐ।

<><><><><><>

LG Sinha

जम्मू कश्मीर दे उपराज्यपाल मनोज सिन्हा होरें अज्ज आखेआ ऐ जे सुरक्षा बलें, आतंकवादिएं आस्सेआ पैदा होआ'रदिएं नमिएं चुनौतिएं कन्नै निबड़ने लेई इक ताजा रणनीति तैआर कीती दी ऐ। कश्मीर घाटी च आतंकवादिएं आस्सेआ मचाई गेदी तबाई च बगे दे मसूम लोकें दे खून दी इक—इक बूंद दा स्हाब लैता जाग। हमहामा च अज्ज बीएसएफ दे 629 रंग रूटें दी पासिंग आउट परेड गी संबोधत करदे होई उपराज्यपाल होरें आखेआ जे भारत सदा गै अपने सब्बने गोआंढिएं कन्नै रमानदारी ते दोस्ताना सरबंध चांहदा ऐ। पर एह इक बड़ी गै मंदे भागें आली गल्ल ऐ जे साढ़ा इक ऐसा गोआंढी ऐ जेहड़ा साढ़े इत्थें बदअमनी फैलाने लेई अपनी पूरी टिल्ल लांदा ऐ, अजें कि ओहदे अपने घर गरीबी ते भुक्खमरी कारण लोक मते परेशान न। उनें आखेआ जे जम्मू कश्मीर च आतंकवाद दा समूलचा नास करने लेई पुलस, फौज ते होरने केन्द्री बलें गी किट्ठे रलियै कम्म करना होग।

<><><><><><>

BSF Anti Infiltration

सीमा सुरक्षा बल कश्मीर फ्रंटियर दे आईजी अशोक यादव होरें मीडिया कन्नै गल्लबात च दस्सेआ जे नियंत्रण रेखा पर घुसपैठ विरोधी बवस्था बड़ी मजबूत ऐ ते स्याले दे मौसम शा पैहले घुसपैठ दी कोशशें गी सुरक्षाबल नाकाम करगंन। गांदरबल ते गुलमर्ग च हाल च होए दे आतंकवादी हमले गी कायरतापूर्व दस्सदे होई उनें आखेआ जे सुरक्षाबल चुनौतिएं दा विश्लेषण करा दे न तां जे भविक्ख च उनेंगी रोकेआ जाई सकै।

<><><><><><>

Baramulla Attack

जम्मू कश्मीर दे गुलमर्ग इलाके च जंदे रोज होए दे आतंकी हमले जेहदे च दऊं सैनिक सनें कुल 5एं दी जनें दी जान चली गई ही, मन्नेआ जा'रदा ऐ जे इस आतंकी वारदात गी अंजाम देने च कोई 3 जां 4 आतंकवादिएं दा हत्थ हा। हमलावर आतंकवादिएं गी तुप्पी फगड़ने लेई तुपाई अभियान अज्ज दुए रोज गी जारी ऐ। तुपाई आली कारवाई च पुलस, फौज ते नीम फौजी बल शामिल न। तुपाई अभियान दा दायरा बाबा रेशी ते गुलमर्ग दे घने जंगली इलाके तोड़ी बघाई दित्ता गेआ ऐ जेहड़ा पैहले शड़ा रिहायशी ते निर्माण आले इलाके च चलाया जा'रदा ऐ। सरबंधत एसएसपी आस्सेआ दित्ती गेदी जानकारी मूजब होई सकदा ऐ जे आतंकी जंगली इलाके च बड़ी गेदे होन। शुक्रवारें सुरक्षा बलें नियंत्रण रेखा दे अलावा आले दोआले दे इलाके च बी ड्रोन दी मदद कन्नै आतंकवादिएं दी तुपाई करना शुरू करी दित्ता हा।

<><><><><><>

India-NZ

क्रिकेट च न्यूजीलैंड नै पुणे दे महाराष्ट्र क्रिकेट एसोसिएशन स्टेडियम च खेड्डे गेदे दुए टैस्ट मैच दे त्रीए ध्याड़े अज्ज भारत गी 113 रंजें कन्नै हराई दित्ता ऐ। न्यूजीलैंड आस्सेआ 359 रंजें दा लक्ष्य दा पिछी करदे होई भारत दी पूरी टीम दूई पारी च 245 रंजें पर गैसिमटी गई। इस जित्त दे कन्नै न्यूजीलैंड नै त्रऊं मैचें दी टैस्ट श्रृंखला अपने नां करी लैती ऐ। पैहली पारी च न्यूजीलैंड दी टीम नै कुल 259 रंज बनाए। एहदे परते च भारत दी टीम 45 ओवरें ते त्रऊ गेंदें च 156 रंज बोर्ड पर लाए। बढ़त हासल करने दे मगरा न्यूजीलैंड दूई पारी च 255 रंज बनाए। जिसलै के भारत दी पूरी टीम 50 ओवरें ते दऊं गेंदें च 245 रंज गै बनाई सकी।

<><><><><><>